

SEMI-PREZIDENSIALIZMU HO MULTIPARTIDARIZMU IHA TIMÓR LADÚN KONTRIBUI BA ESTABILIDADE GOVERNATIVA.

Timór deklara nia proklamasau indenpendénsia iha loron 28 Novembru 1975 nu'udar nasaun independente ida (República Democrática de Timor-Leste). Independénsia ne'e proklama unilateralmente hosi FRETILIN, maibé sorte aat mosu halo governu nia mandatu loron 9 de'it, hakotu hosi Indonézia nia invazaun iha loron 7 fulan Dezembru, 1975. Ho hala'ok ne'e obriga timoroan sira otas ne'ebá tenke tubarai hasoru invazór nia okupasaun durante tinan 24 hosi 1975 to'o konsulta populár 1999. Ho ONU nia tulun harii Governu tranzisaun to'o Timór restaura nia indenpendénsia iha loron 20 maiu, 2002.

Iha restaurasaun ne'e hametin nafatin ho República Democrática de Timor-Leste nu'udar Estado Direitu Demokrátiku ne'ebé hatuur ho hala'ok ukun nian (sistema governasaun) Semi-prezidensiál ne'ebé mai kedas hosi 1975.

Sistema ne'e harii ho ai-riin haat nu'udar órgaun soberania Timor-Leste nian, tuir art. 67 KRDTL, mak hanesan, Prezidénsia Repúblika, Parlamentu Nasionál, Governu no Tribunais, ida-idak hala'o nia knaar haktuir ba Lei-Inan Timor-Leste nian hanesan Prezidente Repúblika nu'udar Xefe Estado no komandante supremu forsas armadas nian nomós iha tempu hanesan reprezenta Estado iha rai-li'ur (CRDTL, art. 74, no. 1 e 2).

Parlamentu Nasionál nu'udar órgaun lejislativu no halo desizaun polítika iha rai-laran nomós liga ba rai-liur, fiskalizadór ba servisu governu nian nst, (CRDTL, art. 95).

Governu nu'udar responsável polítika ba ezekusaun iha administrasaun públika nasaun nian, (CRDTL, art. 103). Tribunais nu'udar orgaun judisiáriu ne'ebé administra justisa hodi garante justisa ba ema hotu, (CRDTL, art. 118).

Ho sistema *checks and balances* ne'ebé tuir loos garante kontrolu ida di'ak tebes no bele halo balansu ba knaar sira, maibé infelizmente ninia implementasaun la efetivu, basá ita haree hahú hosi governu dahuluk (primeiro governo) kedas moris ho konflitu no dezintendimentu entre órgaun sira, liuliu órgaun tolu hanesan Prezidénsia Republika, Governu no Parlamentu la kona malu ho di'ak. Ho situasaun ne'e hamosu krize iha laran hodi hakotu tiha mandatu 2002-2007 iha 2006. Nune'e, iha mandatu ida iha Governu Konstitusionál dala 3 ho Primeiru Ministru na'in 3 (DR. Mari Alkatiri, DR. José Ramos Horta no Eng. Estanislau Aleixo da Silva).

Realidade ne'ebé hatudu moós iha nasaun seluk ne'ebé adota multipartidarizmu hanesan Brazil, maib'e sorte di'ak tanba Brazil ho sistema prezidensialista.

Nune'e, susar loos partidu ida ukun mesak ka manán mesak iha eleisaun. Sei susar liután bainhira forma governu ho koligasaun hosi partidui oi-oin ho prinsípiu no planu ne'ebé lahanesan. Iha kontestu ne'e, presiza haree didi'ak fali lei sira hodi bele respeita prinsípiu demokrátiku sira ho transparénsia, inparsiál no justu. Iha multipartidarizmu, presiza konsidera mós prinsípiu MAIS VOTADU atu nune'e respeitu ba lejitimidade votu populár. Ne'e katak, bainhira partidu ida manán eleisaun independentemente hosi maioria absoluta ka lae, nia mak iha direitu liu ba forma governu ho partidu ki'ik sira. Tenke iha klauzula ida hatete klaru katak, bele harii koligasaun maioria parlamentár maibé labele esklui (hasai) fali ida votus barakliu (mais votadu).

Tanbasá governu monu?

Ita-nia lei sira hasusar formasaun governu no fasilita hamonu governu. Liga ba ita-nia sistema no realidade ne'ebé iha, semi-prezidensializmu, iha órgaun tolu ne'ebé halo kontrolu ba malu mak kontrolu polítiku, subjektivu la'ós jurídku ka kontrolu objektivu hanesan nasaun sira-ne'ebé adota sistema prezidensializmu). Ita-nia rain, órgaun tolu (ezekutivu, lejislativu no prezidénsia) mak halo kontrolu polítiku maka'as liu, kada órgaun ida la satisfeito ho órgaun seluk nia polítika, nia desizaun, nia halo kontrolu polítika, i tanba sistema mak fo dalan, nune'e bele falun ho vingansa no ódiu liuhosi kontrolu ne'ebé halo, hanesan purezemplu:

1. Kontrolu hosi parlamentu ba governu: Bainhira parlamentu la satisfeito ka la aseita governu nia kondusaun polítika, iha kazu maioria, bele hasai governu liuhosi vota kontra programa no Orsamentu Estadu nomós **konvoka mosaun sensura** hodi hamonu governu, (CRDTL art. 111 n.1). Iha 2017, VII Governu Konstitusionál, maioria vota kontra);

2. Kontrolu hosi Prezidénsia Repúblika ba governu: bainhira presidente la satisfeito ho membru governu indijitadu balu hosi Primeiru Ministru, (CRDTL art.106.2) presidente bele la nomeia, bele akontese, Presidente nomeia balun tuir nia preferénsia polítika. Presidente mós bele veto orsamentu ne'ebé mai hosi parlamentu no presidente bele halo demisaun ba governu (CRDTL art. 86 al. G no al.C)

3. Kontrolu ba malu hosi Prezidénsia Repúblika no Parlamentu: bainhira Parlamnetu la aseita Presidente nia polítika no lideransa, Parlamentu bele vota kontra pedidu saída de'it ne'ebé Presidente husu tanba tuir lei tenke hetan aprovasaun hosi Parlamentu

(CRDT, art. 95 aliña h). Parlamentu bele uza nia kbiit ida-ne'e hodi satan PR nia viajen Estadu nian. (kazu VIII Gov. Konstitusionál rejenta beibeik PR nia pedidu autorizasaun).parlamentu mós bele uza nia kbiit maioria kualifikadu (2/3+1) hodi destitui ka halo impeachment ba PR. Nune'e mós, iha kbiit hanesan PR bele dissolve PN tuir CRDTL, art. 86.f.

4. Kontrolu hosi Prezidénsia Repúblika ba Governu; Konstituisaun bele regula kbiit legál hotu maibé interese polítika bele kebra liuhosi desizaun polítika sira-ne'ebé PR foti. Bainhira PR ho Governu la iha entedimentu polítika ida di'ak, bele hamosu impase polítiku no krize oioin iha rai-laran. Ida-ne'e akontese iha Primeiru Governu no ita mós bele haree momoos daudauk iha VIII Governu Konstitusionál.

Matenek-na'in balu husi Espanha, professor Sosiologia no Siensia polítika iha Universidade Yale (Estadus Unidus) nian, JUAN JOSÈ LINZ ho STEPAN, 1994 dehan *nasaun ne'ebé adota sistema semi prezidensializmu hetan risku boot ba estabilidade demokrasia, se bainhira líder entre órgaun rua ne'e (PR ho PM) la iha maturidade polítika natoon ba sira-nia diverjénsia sira.* Hosi perspetiva ne'e lori nasaun ba konflitu tanba presidente tradisionalmente iha poder konstituisionál ho forsa armada bele uza hodi ataka governu, provoka impase polítika, krize instituisionál, konflitu polítiku, ikusliu krize ekonomia (krize polítika no militar iha 2006).

Iha governu dahuluk lidera hosi FRETILIN ukun ho maioria kadeira 55, maibé primeiru ministru troka dala tolu. Governu tolu iha mandatu governasaun ida de'it. Iha eleisaun tuirmai, 2007, harii IV Governu Konstitusionál ne'ebé lidera hosi partidu CNRT, koligasaun maioria, felizmente governu ida-ne'e to'o rohan. (úniku governu ne'ebé ukun

to'o mandatu ramata). VGK ho koligasaun lidera nafatin hosi CNRT, maibé infelizmente governu la to'o rohan mosu remodelasaun no reestrutur ba governu tanba mosu máljestaun, nepotizmu ne'ebé buras tebes iha governu. Partidu sira-ne'ebé hola parte iha governu maioria fó prioridade ba partidu no família iha baze nomós iha nasional. Ikusmai, hamosu VIGK liuhosi remodelasaun governu. Ida-ne'e mosu tanba maihosi konsekuénsia multipartidarizmu ne'ebé hasusar partidu ida atu manán mesak.

Iha eleisaun parlamentár 2017, FRETILIN manán ho minoria no forma VII GK liuhosi koligasaun ho Partido Demokrátiku (PD) ho kadeira 30, maibé forsa política la to'o hodi hasoru deputadu maioria 35 hodi defende programa iha PN.

Ho kontrolu política ne'ebé maka'as hosi parlamentu hamate prematuramente VIIVK nia moris hodi ikusmai Prezidente Republika decide dissolve PN hodi konvoka eleisaun antesipada (CRDTL, 86 al. F) Iha rezultadu elesaun koligasaun AMP (Aliansa Maioria Parlamentár) mak manán hodi forma VIIIGK. Hanesan nasaun ne'ebe ho rejime semiprezidensialista partidu mais votadu ou koligasaun maioria mak iha lejitimidade indijita primeiru ministru hafoin ne'e primeiru minsitru propoin nia membru sira ba prezidente atu nomeia, (CRDTL, 106, 1 e 2). Iha nomeasaun ne'e PR nomeia balun no balun lae (pendente). Ho membru balun ne'ebé pendente ikusmai própriu integrantes hosi koligasaun vota abstensaun ba orsamentu hodi sumba iha parlamentu. Ho ida ne'e governu komesa naksobuk. Prezidente nu'uder xefe Estadu hola inisiativa halo dialógu ho entidade tomak inkluzivu partidu polítiku sira. Rezultadu diálogu hamosu opsaun tolu: 1) Eleisaun antesipada rekursu ikusliu. 2) Partidu polítiku sira atu halo movimentu política hodi hetan konsnsu iha Parlamentu, 3) Kona-ba PM mantein nafatin.

Lihosi opsaun rua nian, hamosu koligasaun foun partidu CNRT, PD, KHUNTO, FM, PUDD E UDT liuhosi konferénsia. Partidu polítiku hirak-ne'e forma maioria hodi indijita sira-nia primeiru ministru. Hafoin proposta ba PR mabibé la iha resposta ruma ba proposta refere. Seraké PR hakarak atu koligasaun foun muda uluk meza iha PN? Ita la hatene. Mosaun sensura ne'ebé atu halo hosi koligasaun ne'e rasik mós la konsege tanba KHUNTO rejeita. Hahú hosi dezentendimentu hirak-ne'e hasusar liután koligasaun foun nia hakaran ba formasaun governu foun (IXgovernu). Bainhira la iha resposta hosi PR, mosu fali koligasaun ho entendimentu foun hosi partidu rua FRETILIN-PLP. Ho desizaun-laek hosi PR halo P. KHUNTO decide sai hosi koligasaun hakat ba koligasaun foun ne'ebé forma tiha ona hosi FRETILIN no PLP hodi hetan maiória.

Ho ida-ne'e aumenta tan tensaun política até mosu destituisaun prezidente parlamentu nasional iha loron 19, Maiu 2020. Disputa poder iha parlamentu, até konflitu, hatudu imajen ladi'ak ba mundu, la afavór ba demokrasia no ba jersaun tuirmai.

Ho faillansu hirak-ne'e maihosi kontribuisaun sistema multipartidarizmu no falta maturidade hosi ulun-boot polítiku sira. Nune'e, ha'u haree katak sistema ne'e la kontribui ba estabilidade demokrasia governativa, hamosu de'it mak impasse política, krize intituisionál to'o krize ekonomia.

Ho partidu barakliu sei haboot liu gastu orsamentu Estadu nian durante kampaña no hafoin manán hodi forma governu, tanba liuhosi formasaun governu ho partidu barak sei hamosu membru governu barak liután. Ita haree, EUA (Estadus Unidus América), rai ida boot tebetebes ho terseiru populasau boot liu iha mundu no jeografikamente kuartu maiór país iha mundu, maibé iha partidu rua de'it (Republikanu no Demokrátiku) ho nia sistema prezidensialismu. Órgaun lejislativu sira metin tebes no ekonomia estavel nomós setór

oioin dezenvolvidu maka'as. Ita tenke tau iha neon no laran katak bainhira iha estabilidade política no governativa mak nasaun bele dezenvolve. Tanbasá ita la bele hetan konsensu hodi halo altersaun ba artigu balu hosi CRDTL hodi adota sistema prezidensialismu?

Tanbasá ita tenke kaer metin nafatin ba sistema ne'ebé la afaavor ba realidade? Tanba ho mentalidade no maturidade ne'ebé la natoon hanesan ita nia líder sira hatudu bebeik no sei atudu nafatin, nune'e se ita manten ho sistema semi-prezidensialismu difísil tebes hetan governu ida estavel tanba kontrolu polítiku maka'as loos. Bainhira parlamentu (deputadu sira maioria) la aseita governu nia kondusaun política, nia lideransa no postura governu nian, sira sei vota kontra projetu ou konvoka mosaun sensura hodi hamonu governu. Tanba ne'e, dalan viavel liu mak sistema Prezidensialismu. Iha sistema ne'e Prezidente presiza de'it iha kbiit negogosiasaun atu konvense parlamentu atu afaavor ba projetu governu nian, tanba hosi parlamentu halo kontrolu ba governu sei halo de'it ho kontrolu objetivu no jurídiku. Maski parlamentu ho governu iha diverjénsia política, sei la implika governu nia mandatu bainhira presidente la komete krime de responsabilidade, (kestaun jurídika).

KONKLUZAUN: Haree ba situaun sira-ne'e bele halo reforma política, semiprezidensializmu ba Prezidensializmu. Fasil ba Timór adota prezidensialismu tanba populaun uitoan, mentalidade la dauk natoon lida ho diferença sira, sei kesi metin ho istória, tradisaun nst.

Ita bele iha konsensu adota sistema Prezidensializmu, iha parte balun ne'ebé afaavor mak, haree ba realidade, ezemplu;

Prezidensialismu: Prezidente mak propoin nia membru governu no nia mak nomeia. Prezidente representa Estadu iha rai-li'ur no iha rai-laran representa governu (xefe órgaun ezekutivu). Sei la iha impase política nabanaba hodi hamosu krize, tanba hosi parlamentu halo kontrolu ba governu, sei halo ho kontrolu objetivu, jurídika, maski parlamentu ho governu iha diverjénsias políticas, la satisfeito kondusaun, política governu nian, maibé parlamentu la naran hatun governu se bainhira governu la komete krime de responsabilidade. Iha-ne'e, presidente/governu presiza de'it kbiit negogosiasaun atu konvense iha parlamentu hodi afaavor ba projeitu governu nian. Ha'u hanoin, klaru ke sistema ida la perfeito maibé haree ba realidade Timór nian hanesan nasaun foun ne'ebé mai ho istória ne'ebé la hanesan ho nasaun seluk. Ita-nia líder sira ladún iha maturidade política ne'ebé di'ak, sei kesi metin ho istória nst. Di'ak liu halo reforma política, fasil atu kontrola. Ita adota tuir Portugal maibé ita-nia realidade la hanesan. Nasaun balun liuhosi reforma política oioin, purezemplu Brazil, liuhosi Monarquia-

PrezidensialistaParlamentaristarísta no fila fali ba Prezidensialista no halo nia ekonomia la'o di'ak tebes dala ruma mak iha inseguransa jurídika maibé ladún implika ba ekonomia. Se ita-nia estabilidade demokrasia multipartidarísmu iha Timór mak la'o di'ak karik oras ne'e ita foin iha kuartu governu konstitusionál no ita-nia ekonomia iha progresu maka'as no infraestruturaz báziku la'o di'ak, nst. Maibé infelizmente, instabilidade demokrasia jere krize oioin halo ita tatidik iha fatin no la sai hosi problema política. Ida-ne'e afeta tebes ba dezenvolvimentu nasaun nian.

OBRIGADO.

TOMÁS MARIA NUNES - OPINIÃO PESSOAL- UBERLÂNDIA, JUNHO 2020.